



Chamna Am

(A Monthly Organ of the Evangelical Synod Church)

Vol. XXXIV

No. 03

June, 2019



2 Naupangte
Hehpihna

4 Pentecost **Kut**
Chanchin

9 Pate Ni

2019
KUM
THUPI:

"THUOKHAT TAKIN TAI HITIU"
HEBRAI 12:1

Editor: Rev. T. Kamgin Gangte

Vol. XXXIV No. 03
June, 2019

Editorial Board

Chairman:
Upa Dr. L.S. Gangte, M.A. M.Phil.

Editor:
Rev. T. Kamgin Gangte, M.Th.

Asst. Editor-cum-Circulation Manager
Rev. Khaitinthang

Bible Study:
Pr. Khailalsiem M.Th.
Evan. Paukhomang B.D.

Contributing Editor:
Upa Paozalun BA
Rev.Khaigin BD
Rev. L.Sata B.Th.
Rev. Thangkhosemi M.Div.
Rev. T. Kampu M.Th.
Rev. Henkholien MBS
Miss Chinbawi MRE

Editor ana hite

1. Upa Lalkhogin	1986
2. Rev. Khaigin Gangte	1987-2005
3. Rev. Lamkawsat	2006-2013
4. Rev. Thangkhosemi	2014-2017

contents

- Editorial.....01
- Naupangte hehpihna02
- Pentecost Kut chanchin.....04
- Pentecost ni thuchah.....06
- Pate Ni.....09
- Missionary Day11
- Ngaihdamna13
- Na chemzam kha apai ah khum in15
- Itthikna!17
- ESC 1998-2019 kum thupi19
- Lalpa'n paucham dan ei sinsak.....20
- ESC Balaram Khul Nambol Report.....21
- ESC Synod Bible School.....23

- Kumkhat lakman Rs. 150/-
- Thusuoh nuom nei te'n ESC Office Post Box-54, Chiengkawnpang, Churachandpur a thak ding.
- Ala nuom leh a man pie nuom te'n circulation Manager, hetsak ding.
- Thukisuh cheng hi ESC Ngaihdan ahi vek khel puoi. Article zikte'n a mawh a kipuok chiet ui.

CHAMNA AW PHUNGVUKNA DING

1. Chief Patron	-	₹ 5000.00
2. Patron Member	-	₹ 4000.00
3. Diamond Member	-	₹ 3000.00
4. Gold Member	-	₹ 2000.00
5. Silver Member	-	₹ 1000.00

PRINTED AT
THAWNSAAU PRINTING WORKS
CENTRAL LAMKA

PATHIEN NASEM PHA

Na semtu chuh lawh mutak ahi, tih I Bible (Lk. 10: 7) ah muh in a um a, chun, Bible mundang ah, “Kuo’n le na asep nawp loh chun, nek le ne kihen,” (2 Thess. 3: 10), tih sinsak in i um zel ui.



Tuni a i vak gennuom chuh, “Pathien nasem pha,” tih ahi a, amasa’n Pathien nasem tih hin kuo tieng hi I huopsak ding u? Mission Worker haw cheng chauh hi ahi die? Zie tieng phet hi huopsak zieng lo in, kuo hileh a huoploh a umpuoi, tih hi zaw henla. Sawlchak Paul in Pathien nasepna lam ah Philippi mite avak tilkhouhna a khan, “Ka umpet maia semlo in, tu a ka umloh kal hin sem zawu inla,” (Phil. 2: 12) atih hin nasa tak in lunggelna ei siemsak in ka mu a, gelle ngai him ding ahi. A umdan tak hi Paul hih Philippi a Sapchuomite veh a achieh phatphat leh khenkhat chuh thagau lama hat mahmah hileh kilawm taka Paul umpet nana na a chuh tawmngai taka pan la a sem kutkut zieng um hidan ahiu hi. Zie te haw kawm hi ahi Paul in zie thu agen na hih. Nasem hinga’lin Paul hin kipahpih theih hi’n ahelo ahi. Aziek chuh Paul in ataihsan phatphat leh ana thudukdak kitzello ahih ziek un. Zie a Paul in a awihmawh te dinmun leh ahihnau hi, “Mimaipha hawl,” atih teu haw khu ahideuh ui.

Pathien a dinga napha sem ding chun bangti a sep ding ahita die le? Philippi mi te khenkhat in Paul khah ana maizah mahmah uh a, amah muhmuh a tawmngai taka sep kha Pathien nasem in akingai uh a, Paul umloh kala sep kha Pathien nasep a ngailo hileu kilawm tak in alang hi. Ahih ziek in zie a ahetloh uh khat um chuh, Pathien mitmuh a um ahihlam uh kihelo ahiu ui. Paul kha a Pathien uh ahi puo a, na semleu semkileu a umdan chengu leh alungthim cheng cheng uh muzing zieng Pathien hing nei ahihlam uh kihengilh ahiu hi.

Tuni hin, kuo ahim khat (zieka/maipha hawl na a) nasem ding i hi puou a, ahihloh leh kuo ahim khat iplahna zieka nasemlo zieng ding le ihi diek puou hi. Pathien napha sem ding chun mi va hah kansui takluot angai puoi, mawhpuokna piek a I umna a khan gin um tak leh thalawp tak in pan lazieng hengla semzieng leng, zie chuh: **Pathien Nasem Pha** hihna chuh ahi.

NAUPANGTE HEHPIHNA



Rev Dr Ellien Gangte

Isu'n a kawmah, "Lalpa na Pathien chuh na lunggil chengcheng, na thagau chengcheng leh na lunghim chengcheng in na hehpih ding ahi. Zie chuh thupiek lienpen leh khawkpen ahi. Matthai 22:37-38. .

Pathien hehpihna: Thupiek lienpen leh masapen chu Pathien hehpih ding ahi. Pathien chu I lunggil chengcheng, I thagau chengcheng leh I lunghim chengcheng a I hehpih dinguh ahi. Juate chun a paucham phat uleh savun a Bible chang kizik 'thupiek masapen' kiziel, thingkuong neucha sunga um, khutngei a Hebrai pau a kizik chu ladawk in, khut'in a chawi uh a, a sim sek uh ahi. "Aw Israel mite haw, ngaitiem u, Lalpa I Pathien chauh u hi ahi Pathien chuh; Lalpa na Pathien u chuh na lunghim chengcheng u a, na lunggil chengcheng u a, na hatna chengcheng u a na hehpih dinguh ahi. Dannihna 6:4-5. Thingkuong mai zawn tawh chalpang kituok chun lunghim ngaihtuoh a etsak a, veilam ban chu lungchang tawh kinaih ahi.

Cha leh naute hehpihna: Nulepa'n nau a neih ziekun a kipak sek uh ahi. Sakei zieng inle bangmah suksiet neilo sakhi leh sa dang dang delh in, that in a ne sek mahleh, a note a hehpih mah mah a, pha takin a enkawl hi. Inkuo'n kihehpihna hih Pathien apat ahihloh chun chieh zawm zolo ding ahi. "Kuole, ka kawma hung chun, a pate, a nute, a zite, a chate, a suohipihte, a suohiphnute, leh amah hinna nasan le a hawt loh chun, ka nungzui hi thei puo'n a. Luke 14:26. Nulepa te'n chate chu hehpihna leh thuokhatna manga a et kawl dinguh ahi. Chate sukkhelhna chu ahun taka sukdkik ahihloh chun siemphat zagh hilo ding ahii hi. Thununna chuh naupang apat chun lamang ki'n, mawlh in zêp mahleh chun thi lo ding ahi ngâl a. Thuchingte 23:13.

Nulepa khenkhat a chate dinga puonnem bang mai, duot a duot zieng aum bawk ui. A pilepu khenkhat in a nulepate sanga hun hehpih a, duot zaw nalaite ziekin chate hinkhuo suksiet aum in, chavai deuh deuh ahiju hi. Nulepa'n chate thunnunna a piek u a, a zep phat uleh pilepu'n chate a panpih ziengloh dinguh ahi. Ngaitie, cha leh naute hi Lalpa apat a I gochan uh ahiju hi; Gil a gah hi a kipahman ei piek chuh ahi. Sam 127:3. Khawvel a gochan cheng cheng hi alopina tawh mangthai vek ding ahi. Lalpa'n nulepate leisieta go a piek, ahihna bang banga Vangam tut theih chu cha leh naute chauh ahi. Nulepate'n chate hukdamna 'Pienthakna' ding a ngaihkhawk pen dinguh ahi. Naupang chuh a chiehna ding tak lampi chuh sinsak leh chin, a hung upat tieng lele thahtham lo ding ahi. Thuchingte 22:6. Naupangte I genpih urchun a hetna dinguh a, I panpihnau ahi. Naupangte I sinsak chu hetna leh khantohna ahi.

Naupangte zilna chu hetna, khantohna leh nasepna ahi.

Naupangte sinsakna a pilvang ding:

- ❖ Naupangte chu a mawhnau umlo a, gaihloh ding ahiju hi.
- ❖ Naupangte'n ngaihtuohna lienpi nei ahijh ziekuh tilkhoh zing ding ahiju hi.
- ❖ Naupangte chu hauhsak leh chatgah thu a khenchuom loh a, kibang tako etkawl ding ahiju hi.
- ❖ Naupangte tawh kipak khawm ding ahiju hi.
- ❖ Naupangte lehkhasimna a, a lunglut loh phat uleh mawk gaih ziengloh a, a ziek hawldawk masak ding ahiju hi.
- ❖ Naupangte'n thil haksa atuok ziek ua fello hithei ahiju a, mawk nuihsan loh ding ahiju hi.
- ❖ Naupangte khantohna cheng chu a dindetpih theihna ding u a, tilkhoh ding ahiju hi.

THUCHING

- Rev. Khaitinthang

- ❖ Bangmah bawl lou a na um mai mai hun inle, hun chuh achieh zel hi.
- ❖ Zinga dingin ki nga kinla, tuni hih, a lul zie bangtak in mang zawn.

PENTECOST KUT CHANCHIN

(BIBLE CHANGTE: THIEMPUDANE 23:3FF; NASEPTE 2:1)

Rev. Khaitinthang

Chun, Penticost Ni a hungtung in, gingtu te cheng chuh, lungthim munkhat in a bawn un munkhat ah a um khawm vek ua.

Atangpin Judate hin Kutpi pawimawh tak tak sagih (7) a nei ua, zie chenglak achun a Penticost i tih hile

Kut pawimawhtak khat ahi (Thiempudante 23:3 ff). Ziete haw hin umzie nei chiet a hiu. Zieziekchun, a nuoi a kut chi sagih(7) hih vak en khawm hi tiu:

1. Chiehkan Kut

Chiehkan Kut hin Isu Krista, I ding ua, a kipiekna a etsak hi (Thiempudante 23:4-4; 1 Korinth 5:7). Nisan or Abib, April tha hi a kumthak hun uh ahi sek hi. Zie nitak chuh Chiehkan Kut Ni chuh ahi. I ding ua Isu Krista, kross chung a, a kipiekna etsakna ahi.

2. Changthak Chawl Sawhlouh Kut

Changthak Chawl Sawhlouh Kut hin Thiengtho taka umna a etsak hi (Thiempudante 23:6-8, 1 Korinth 5:6-8, 2 Korinth 7:1, Galati 5:7-9). Chawl tih hi suol etsakna ahi. Sinsakna

diklote umdan, mawilote cheng hih, Krista Kross zala thiengthou taka um ding etsakna hi.

3. Gah Masa Kut

Gah Masa Kut hin thawhkitna a etsak hi (Thiempudante 23:10-14, 1 Korinth 15:23, 1 Thess. 4:13-18). Isu Krista chuh, Thoh Mapuipa ahin, chuleh hungkit ding a hih dan ei muh sak hi.

4. Penticost Kut

Penticost Kut hin sapchuom din dinga Thagau Thiengtho a hung tunna ding a etsak hi (Thiempudante 23:15-22) Sawlchak te nasep 2:1-4) sawmnga na tihna ahi. Chiehkan Kut kha Nisan, April ni 24 apat ahi a, Changthak Chawl Sawhlouh Kut chuh Nisan ni 15 a mat ahi. Gah Masa Kut chuh Nisan (April ni 16 a mat ahi kit a, Chawhni (Sabbath zagh a ni masapen, ni sagih(7) ni masapen chuh Lalpa Isu Krista Ni chun

Thiempu chun buhphal chuh Ho-In ah a hun lhat ni apat chuh sim a Chawlhn 7 x 7 atin ni chuh ni sawmnga (50) ahih ding ahi.

Chawlhn Sabbath jawh a ni masapen chuh Pathienni, Isu Krista thawhkitna Ni chet ahi. Tua ei un Kiginni I tih hi Judate Sabbath ahi. Hapta sagihna chieh chuh ni 49 chuh Judate Sabbath ahi a, a ni sawmngana chuh Judate ni sim dan a hapta kipatna dinga ni masapen chuh tua Pathienni I tih uh, I Lalpa Isu Krista guolzoa a thawhkitna chet hi ahi kit hi. Judate'n zie ni chuh Penticost Kut in ana mang sek ui. Zie chuh Thagau Thienghou hungtun ding etsakna chuh ahi. Penticost Kut in a etsak bangtak in Thagau Thienghou chuh a hung tung tai (Nasepte 2:1-4)

5. Pengkun Kut

Zie Pengkun Kut hin Israel chate a gam ua sap khawm kitna ding a etsak hi. Penticost Kut leh Pengkun Kut kikal ahin, buh lak hun aum a, zieiekchun, hun sau tak tha li (4) hun aum hi. Zie hin Thagau Thiengho nasepna zala sapchuomte mang a, ningtin a a mithiengho te lakkhawm hun, lungsietna hun a etsak hi. Atawpna achun Sapchuomte

hi, Van a laktouh a um ding I hiu. Israel chate chuh a gam ua sapkhawm aum ding ahi (Isai 18:2; 27:13, Joel 2:1, Thiempudante 23:23-25)

6. Tatnani Kut (Thiempudante 23:26-32)

Zie hin Israel chat gitlouh kisik hun ding uh a etsak hi. Kum sang huna Israel chate dam a ana umna laiten a Mesiah uh ahih he a, a kawma akithoih ding uh etsakna le ahi (Dannihna 31: 1-10, Zaka. 12:10-13, Rome 11:25-27)

7. Bwkcha Kut (Thiempudante 23:34-44)

Ziehi sapchuom ten Lalpa Isu Krista hetzing na a Sacrament I bawl sek bang ua, Dan a thil hung tung dingte thil lawkna ahi. Aigupta gama pawt a suohchaknau hetzingna ahi (Chang 43). Zie khel achun a gam ua puiikhawma a um ua, Israel chate chawldam taka aum ding uh etsakna le ahi. Israel chate chauh le hilo in mi cheng cheng le a tel thei hi. (Zak. 14:16-21)

Zietak a Penticost Ni a mitam tak ten Pathien vangsakna a chan theihnau hi sinsakte leh gingtu mi 120 te chuh Jerusalem pindan chung nung achun, lungthim mun khat pun a um khawm ui. Zie a

kipunkhawte chuh, Lalpa a lungthim pumkhat a a um ziek un, Pathien kipah lam tak ahi. A vangsaak nawp lam tak le ahi (Matt. 18:19) A kithutuok nau chuh Lalpa Isu Krista; Chapa zala Pathien lopina ding ngei a a hih ding ahi. (John 14:13 -14)

Tuni hin ei uh gingtu te leh Lalpa Isu Krista zala, Thagau a pumkhat te haw hinle, lungthim kibang leh, diehdan kibanga Pathien lopina dinga pan la a,

na I sep u chun, Pathien kipah lam leh A vangsaak nawp lam hi ding I hiu.

Pathien Thagau Thiengtho in Jerusalem a mithiengtho 120, khawvel pumpi a dinga a mat theih chun, tuni hun a nang leh kei le Pathien in lopitak in ei mang thei zing ahi tih he ngilh puoi tiu.

Lalpa'n simtute cheng ei vangsaak chiet ta hen.

PENTECOST NI THUCHAH

Rev Dr Ellien Gangte

Peter Chanchinpha thugen zalin Thagau Thiengtho hungin mipi sangthum lam in hukdamna a neih lawh ui. Pentekost Kut hung kipatna hih hetchet masak amamawh hi. Lalpa'n Israelte Aigupta gam a, a pawtdawk zan uh kha Chieh-kan Kut, saltang zalenna ahih hetzingna a matzing dingun A phatsak hi. Chiehkan Kut apat Ni 50 atitni'n Sinai Tang a tung u a, Lalpa'n Mosie mangin dān apie a, 'Pentekost Kut' amat pan uh ahi. Pentekost chu Grik pau a 'Pentecost' 'Ni 50' tihna ahi. Pentekost Ni ahung tun in tia ei uh leh Judate matdan hih kibanglo ahi. Judate dinga

Sinai Tanga Dān piek a, aum niu tiemtehna ahi a, ei uh a dinga 'Dān-thak' piek a I um niu, Thagau Thiengtho pieka I um niu ahi. Thuthun Lui 'Dān piek a, aum uh hetzingna hilo a, Thuthun Thak a, Thagau Thiengtho, Dān-thak I neih tak uh hetzingna a kimang ahi.

Judate'n Dān Lehkhathu in Pentekost amang u a, ei uh Kristiente'n Thagau dān' a kimang ahi. Amah mah chun thugawlth thak zenviel dingin ei butin sak a; dān lehkhathu mai hi zenviel ding hilo in, thagau lam zenviel dingin le ahi zawi. Lehkhathu mai chun a that sek a, Thagau chun vang

a suhing sek hi. 2Korinth 3:6. Thagau dān chu pentui a zik thawh hiloin I lunggil a zik hizaw ahi. Van apata Thagau Thiengtho hung chun mipi lungthim ah thugen in, A sudim a, mei guola kilak in, pauhetloh ahun thawh u a, mipi chengin maksatak kawmin a hung kikhawm ui. Thagau Thiengtho chun a lungthim uh luoh dim in, thu-awihna hinkhuo mang thei dingin amau a pui hi. Zikthawh dān leh Thagau dān kibatlohma lienpi mutheih in aum hi.

Sinsakte chu lungkham leh lautak kawma a chutlai un Thagau Thiengtho A hung a, sinsakte lungthim chu kipahna leh hansanna'n a hun luohdim hi. A kam u a thu gendingte pie'n, lungsietna a kankhawm aum in, hangsan takin Chanchinpha a hun tangsappih thei tau hi. Thagau Thiengtho in Lehkhabu ahihlohleh dānbua, Aziksak hiloin, a lunggil ah A hun zik zawk ahitai. Lungthim a kipakna thak a hun nei u a, Pathien masanga kipakna'n a dim u a, hehpihna'n a dim u a, bangkim thil hung tungte chu thuok thei dingin a hethiem u a, tichun kipak takin a kipanpih tuoh thei tau hi.

Thagau Thiengtho Na sepna bangti'n a hung kilang to zel hi? "Chun, Pa kawm apat

Lungmuonpa na kawm u a ka hun sawl ding chuh, Pathien chanchin diktak phuongdawk sek, Thagau chuh a hii. Amah chuh Pa kawm apat ka hun sawl ahi a, amah chun ka chanchin hun hetsak ina. Johan 15:26. Chanchinpha khawvel gamtin phuongzak un tih I ngaitha zing u a, mahleh Dan apat kuomah thiem chang zolo ahi. Pathien in khawvel A hehpih mah mah ziekin, A Chapa changkhat neih sun A pie a, Amah chuh kuole a gingcha taphawt chuh a manthai loh u a, kumkuo a hinna a neih zawk nāng un. Johan 3:16. Ei uh nasep zala le thiemchang chang zo talo I hih lai un, Pathien in A Chapa changkhat neihsun A hun sawl a, Isu Thisan a thiem chansak I hiu hi.

Thagau Thiengtho chu kuo ahim? Pathien khat a mithum 'Pa, Chapa leh Thagau Thiengtho ahi. Pathien mihing Isu a hung hi ahi. Tichun Isu chuh ei uh gitlohma ziekin A thi thei ahi. Thagau siem thak a, pienthakna Ineihua, hukdamna I chan theihna dingun Isu chuh thihna apat A thokit hi. Isu Krista Vangam a chieh nungin leisiet a lungmuonpa Thagau Thiengtho hung ding ana genlawk hi. Luke 24:49. Pentekost ni'n Thagau Thiengtho chu A hung hi. Nasepte Bung 2. Thuthun Lui

hun lain Thagau Thiengtho in khenkhat chu amamawh ziekin chawmcha cha a umpih a, mahleh Thuthun Thak ahi'n A chenchilh zawk ahi tai.

Bangtik hun in Thagau Thiengtho chu ka chang, ka nei hi? Nang u le, hukdamna a hun pui, Chanchinpha thudik na zak ukhan Pathien mite na hitau kha. Krista na gingchau a, chun, Pathien in Amah a na hih uh etsakna dingin Thagau Thiengtho A tiem ngeia chuh mawhuol nam khum na hi tau hi. Zie Thagau chuh, Pathien in A mite kawma A thutiem chuh pie ngéi ding ahi tihna ahi a; chun, Pathien in Amah a te chuh tatdawkna bukim pie ngéi ding ahi tih ei hétchet sak hi. A lopina chuh pakchai tiu! Ephesi 1:13-14. Pathien in Isu Krista'n na gitlohma cheng cheng A ngaihdam hi tih na taksan, ginchak chet leh, Thagau Thiengtho a hun piek chet ahi. Thagau Thiengtho

panpihna zala Isu chu na taksan theih chauh ahi.

Thagau Thiengtho in bangti'n ei panpih hi?

Khutichun, Pathien in a thawna ei piek haw chuh I het theihna dingun, eihaw vangin chuh zie van nuoia thagau hi hilo in, Thagau, Pathien in ei piek chuh I muh zawk uh ahi. 1Korinth 2:12. Krista Isu achun, zektan bangmah a phachuom puoh a, zektan loh le bangmah a phachuom diek puoi; taksanna a, hehpihna nasep vang chuh a phachuom ahi. Galati 5:6. Thagau Thiengtho in gilo I hihnau ei kimuhdawk sak a, sie leh pha het khenna ei pie a, a pha tel theihna thahatna le ei piei. Pathien kipahna a hin theihna lampi le ei sinsak bawk hi. I hatlohnau ahle hatna ei pie sek hi. Rome 8:26. Pathien chate I hihnau hetchetna le eipiei. I kipak takzet ui. Thagau Thiengtho Pathien chu pahchakin um hen! Amen!

THUCHING

- Rev. Khaitinthang

- ❖ Mihiemte hi Pathien ei siemtu sanga, lopi zawn I kingai ui.
- ❖ Kipahna hih a hawl a hawldawk chi ahipuoh a, a sep a sep dawk ding ahi.
- ❖ Pien ding leh thih ding hin damdawi anei puoi, a kikal nuomtaka mang thei dingin vengbit mai in.
- ❖ Hetna nei in a hetna, a ki saktheih pih a, miching vang a ki ngainiem hi, hetam a kisapuoit.

PATE NI

(FATHER'S DAY)

1. Ahung kimat pat dan:

“Pate Ni” a na mat masak na pen u chuh USA Washington a The Spoken Ministerial Association khan 1909/1910 in a na mang pan ui. Mrs. John Bruce Dodd kiti hin Nu ni (Mothers’ Day) a thu kigen angaihthakna a kipat Pa lul zie leh a pawimawh zie ahun muhdawk a kipatin Pate Ni hile kimang leh phana tih angaihtuoh a, zie apat achuh hung kipan ahi. Pate Ni kiti hih mun tamtak achun June tha a Pathienni thumna (3rd Sunday) hih a mang sek ui. Zie thu hih, hun bangchan ahim chuh kuoma’n a he taluo puou a, ahi’n mun khenkhat achun Pate zahna latsakna a amatdan tangpiu chuh ahih leh pakcha Rose pak San leh a Vam tih haw leh Thingnah Hing (green leaf) haw hin a kichei deuh sek ui.

Mrs. John Bruce Dodd hih neucha ahih lai in a Nu’n a thihsan a, apa William Smart chun amau haw unau gup ahun enkawl a, ahung piting tau hi. Apa hih America Civil War ale nasa tak in ana pang hi. Zieziek chun Mrs. Dodd chun apa, nasep taima, miphak tak leh kuhkal leh kitup, chate lungsiet thiem tak Pa ahi tih a muchien mah mah hi. Anu thi ta mahleh, apa chun amau unau gup chuh lungsietna nei leh hehpih tak mai in a enkawl a, Insung nuom takin a um ui. Khutichun, a chate chun apau zah leh limbawlna ding chun pan nasa takin ahun la tau hi. Khutichun Spoken Church a Pastorte kawm achun ana

gen u a, June tha a Pathienni thumna chuh “Fathers Day” ti’n special takin ahun mang pan tau hi. Zie a kipat chun America gamsung a Sapchuom dang dang tenle zie ni chuh ahun mang sau sau tau hi. Hun a hung chieh zela, khawvel pumpi a Sapchuom te’n le ahun mang pan tau hi.

Zie ni a Chanchin Pha genna ahih Pastor/Minister te chun Inkuon ading Bible piekna (Present) hun lemchang ahi a, Bible ahin Pate dinmun bangti’n ana gen em tih haw muhdawkna dinga, Bible sim dinga tilkhouna hun ahi sek hi. pate chona (Challenge) hun, Pate chun hih dan

vantanga Insung mawhpuokna Nu chunga ngatha mailo a, Thagau lama puitu (Spiritual Leadership) hihna nei ahii a kihetdawkna dinga chona leh chielna hun lemchang ahi.

Zie ni a thugenna a phachuom pen khat chuh “Mi khat chanchin” (Biographical Sermon) manga thugen ahi. Bangzieka Pa khat chuh lawhsam a bangzieka Pa dang lawhting ahim tih Pastor chun a suklat ding ahi. Sapchuom a pate chuh changtak ahim velkuol deuh (direct or indirect) a kigente chuh hethiem ding leh thuokhat dinga siem thei ahi.

2. Kikhawpna hun matdan bik khenkhat:

- (1) Pastor chun zieni chuh kipak kawm taka matding ahi.
- (2) Matchak ding tampi um lakah zie ni chu tawh kituok pen ding chuh atel ding ahi.
- (3) Nu leh pate'n naupangte hinkhuo siemna Bible a etsakna hawihtak tak etsakna a matding ahi.
- (4) Pastor chun Bible apat

a etsakna khel ah amah chanchin leh a thiltuok a hah mat takluot loh ding ahi.

- (5) Thugen chun a ngaihnawp um ding mai ngaihtuoh loh ding.
- (6) Na gen guot chuh gen zieng inla, a taka sepdawk na guot ding ahi.
- (7) Na thugen chun micho (challenge) ding takin gen inla thutanna siem bat zieng loh ding ahi.

3. Bible chang matchak ding khen khat:

- (1) Gen. 18 : 9.. Pathien in Pa pha a etdan.
- (2) Deut. 6: 4 - 9 ... Pate nasep ding (duty)
- (3) I Sam. 2:12 - 34 ... Pa, thil sukhie, Eli.
- (4) Job 1: 5 ... Pate lunggel, lungput.
- (5) Prov. 1: 8, 9 ... Suongmantam leh Lallukhuk.
- (6) Luke 1: 5 ... In diktak (True home)
- (7) Ephesi 4: 12 .. Inkuon kituok taka chenkhawm thiemna.
- (8) Kolossa 4:15 ... Inkuon sunga Kristienna.

Ahung tung kit tai

MISSIONARY DAY

-Mangkuo Gangte

Kum 2019 hih Manipur South District chanchinpha meisel in ahun salhvâkna kum 109 atitna ahung hitai. May 7 ni khan Government in le gazetted holiday a aphioung dungzui in munchuom chuom leh sapchuom tin in **Missionary Day** I na mang kit tau hi. Missionary Day chanchin hih hetsa sa hilele avel in ana henailote a dingin ana tâklang kit hitiu.

Kum 1904-05 lai khan Pathien thagau nasepna ziekin UK sunga Welsh gamah halhthak na (Revival) nasatak ana tunga, zie a pan chun, tangval khangdawng cha khat chuh Pathien thagau sapna changin, sum le pâi neih le lam tuok dawk lo in amah taksa ngîi chuh chanchinpha tângkopih dinga kuon dawk dingin ahung kipie tha tai. Amah chuh kuo dang hilo in tangval feltak le kuhkal tak, unâu Lusei te'n Sâp tlangval tia agen gen pau, Watkin R Roberts kitipa chuh ahi. Watkin hih 1906 vel in chuh khawigam

hilele kuondawk zieng dinga kimansa a um ahi tai.

Welsh gam thagau mei in akâk zieka hung kipieha Tangval Watkin Roberts hih Pathien sapna chang mahleh Abraham guola khawigam zuon a chieh ding ahim tih ahe diek puoi. Khutia aum lai in, a tûnga pata ana kimêlhêtpihsa Dr. P. Fraser kitipa hih azi tawh Aizawl a Missionary a aum lai takuh ahi a, amaute nih nupa'n bêl dingin North east gamah chanchinpha phuongzâk dingin ahung kipuo lut tai.

Watkin Robert Aizawl a aum zing lai in, maktak mai in, England a numei khat, Emily Davis kitinu hin dangka pound 5 ahun thâk hi. Pound kiti hih ei un Rupees i tih sek uhil ahi, a um dan chuh Rs. 5/- ahun thâk tihna ahi. Kum 1910 vela pound 5 kiti chuh a value sâng mah mah ding ahihna banah it khamtak hiding ahi. Zie numei nu hin pound 5 a piek hih banga kimang ahim helo ahi. Watkin inle kuon ahun thâk ahim tih helo ahi.

Zie sum chuh banga mat ding, bang chawkna a mat ding ahim tih a kigeltha thei tapuoi. Atawp in, zie sum puond 5 chuh, JH Lorrians leh FW Savidge in chanchinpha Johan bu, Duhlian (Lusei) pau a ana lehdawk (translate) uchuh bu tamtak a chaw a, ana bân hawp viel tai. Zie chanchinpha Johan bu chuh Manipur gamsunga um Senvawn khuo ah copy khat ana kihawm lut hi.

Zie lehkhabu chuh, Senvawn tieng tung mahleh Senvawn te'n angaihna helo in milawng tuilien et in ana et thawh mai mai ui. Senvawn khuo hâusa Kamkholun Singson in zie lehkhabu cover a chun, “Hotupa, na lehkhabu hawp hih kasim ut ua, kahe ut ua, bang thu ki zîk ahim nang ngêi hung inla ei hung hilh chien un” ti'n a leh thâk tai. British te record dungzui a Manipur thingtâng mite hih gâl lu late (Head hunters) tia tiemteh ahih ziekin Watkin Robert Manipur a achieh ding chuh lemchâng in agel puou hi. Mahleh Watkin in thihiph dinga atêl chanchinpha chuh thihiph ding ahih lele thihiph ding ahi mai hi ti'n ahung kipan dawk tai.

Zie hun lai a, Manipur mi, Pu Thangkai leh Pu Lungpau Aizawl a sum kilawh a umte nih chuh hun kitawn pih in chanchinpha chuh Watkin Roberts in Senvawn khuo ahun tut tai. Zie ni chuh May 7, 1910 ahi a, zie ni a Manipur south District sunga chanchinpha hung kipuolut chuh a khatveina ahih zieka tuni tienga hih May 7 ni hih kum cheng leh Missionary day tia ki mang sek ahi.

Aizawl a kileh kit in Dr. P Fraser tawh akiho ua, Manipur gamsunga missionary sawl ding apawimawh dan agen khawm utawh kitawn in, missionary dingin, Savawma, Vânzîka leh Thangchhingpuia @ Taitea kiti te chuh ahun sawl ui. Manipur a Christianity tawh kisai a, a ainah phah masate cheng salute i pieu hi. Pu Watkin hih a têknung tieng inle Mizo te'n Sâp tlangval ati nalai ui. Lalgam na nasatak a asep nung in, Pu Watkin chuh, 20 April 1969 khan ana asep zing, a Lalpa kawma chawl di'n ana chieh masa tai. Watkin thita mahleh anasep leh amin hih thithei lo in Manipur thingtang mite lunggila thithei lo in achâm zing tai.

Hetdinga pha chuh, England a numei khat in pound 5 apiek zieka ei u haw lawi lekluk hin chanchinpha i na muh lawh uh ahi a, tuni hin eihin le Pathien a pata vângsak na tamtak i chan te'u a pat leh i thilpiek zieka midang khat in chanchinpha ana muh lawh thei ahi tih geldawk a piek dawk na châng hetding ahihdan ei muhdawk

sak mah mah hi.

Chun, Watkin Roberts in kum 109 masang lam peka i gama a nasepdawk sa chiltui va hiela i gen gen hun uh ahi tapuo a, ei sung ngêi a pata hih Watkin dang hung kisêk dawk hun hitalo ahim ? Pathien in i sapchuom sungah Watkin tamtak ei siem dawk sak tau hen. *Ka kipâk hi.*

NGAIHDAMNA

Evang. Lamzagin

Isu thugen: “*Hepa, amau hi ngaidam in, a thilhih u hi a he puou hi,*” a ti a. (Luke 23:34)

Zie chun, Peter a hunga a kawmah, “ Lalpa, ka suohpih in ka chungah bang zat vei thil hihkhiel leh ka ngaihdam ding ahi die? sagih vei tiengin ahi die?” a ti a. Isu’n kawmah, “Sagih vei tiengin,” ka ti puo’n “Sagih vei mun sawmsagih tiengin, ka hung ti zaw ahi. (Matthai 18:21-22)

Mitin in na lunggil tak u a na suohpihteu na ngaihdam loh u chun, ka pa van a um inle khutibang tak chun na chungu ah hih ina,” a ti a. (Matthai 18:35)

Ken chuh ka hun hilh ahi: Na melmateu hehpih un la, a hun samsie te chuh paucham sak

un la, a hun mudahte chuh bawlphau un la, bangmah a hun ngailote leh a hun sugimtheite chuh paucham sak un, (Matthai 5:44)

“Himahleh, nanguh ka thu ngaite haw, ka hun hilh na hiu hi: Na melmateu chuh hehpih unla, a hun hawte chuh a phatna dinguh hih sak un la; a hun hosie te chuh vangphat pieu unla, a hun bawlsie chuh paucham sak un. Mi’n na bieng uh a bet chun a lehlam le dawh un; mi’n na puon a hun lâksak chun, na puonâk u le pie ngâl in. (Luke 6:27-29)

A ngên cheng kawm achun

pieu inla, na sum hun lâksakte chuh ngên kit kiu. Chun, mi'n na chunga a hih dinga na deih bang tak chuh mi chung ale hih un. "Nanguh hun hehpihte mah na hehpih u hin, kipahman banga na muh dinguh? Mi gilote'n le amau hehpihte chuh a hehpih thuk sek uh a puo. (Luke 6:30-32)

Muh kit na kinepnateu mai thil na palâk sak u hin, bang ziekin a kipahman na muh dinguh? Mi gilote'n le a zah mah a muh kit dingun mi gilote kawmah a palâk sak sek uh ahi. Khutichu hilo in, na melmateu hehpih unla, a phatna dinguh hih unla, bangmah muh kit kinepna hilo in palâk sak un. Khutichun, kipahman tampi nei un na tin, Chungnung pên pa chate hin lau. Amah chuh mi kipahna zie helote chung leh mi gilote chuh a hehpih sek ngâla. Zieziekchun, na Pau in mi a lungsiet guolin, mi lungsiet un. (Luke 6:34-36)

Sawlchak Paul thugen: A hun bawl gimthei ta vangphat pieu inla; vangsak unla, hansie lawh kiu un. (Rome 12:14)

Himahlele, na melma a gilkiel chun nek ding pie'n, a dangchâk chun, dâwn ding pie'n: khutibanga na hih chun, a luzâng a mei-âm suon sak hi'n la. Gitloh zawhin um ki'n

la, phatna'n gitloh chuh zo zawh. (Rome 12:20-21)

Ka khut u a sem in ka gimthei u a; mi'n ei gaih tieng u leh, vangphat ka pie sek u a; mi'n ei sukgimtheih phat u leh, ka thuok hâm hâm sek u a; Mi'n ei hêk tieng u leh, thep lungdam ka guo hâm hâm sek ui. Tu zieng hin le, khawvel mite deih loh, leisiet thil nin, paigmang mai ding guola bawl in ka um ui. (1 Korinth 4:12-13)

Sawlchak Peter thugen: Mi'n a gaih inle, a gai thuk puoh a, a thuok lai inle, a vau diek puoh a, himahlele, a kinepna chuh Pathien, diktaka hih sek pa achun a kawih zaw sek hi. (1 Peter 2:23)

Stephan Thugen: Chun, a khupdin a, aw ngeih tak in a kiko a, " Lalpa, zie a thilhîh gitloh u hi, a chungu ah mawh puok sak ki'n," a ti a. Chun, zie thu chuh a gen zawhin, a ipmu ta a. (Nasepte 7:59-60)

Missionary John William Leh Bishop Hannington te thugen:

Sasiel neten a taksau a nek zing lai un ahat uh abeih man/athihmau in, Isu thugen mah, "Na melma teu hehpih un, a hun mudah te chungah thilpha bawl un." A ti malam ui.

Lalpan A thu vangsak hen.

NA CHEMZAM KHA APAI AH KHUM IN

(MATTHAI 26:52)

-Evang. L. Minthang,
D. Phailien

Bible dungzui in chemzam chi nih aum a (Gingtu a um chemzam chi nihte chu)

1. TAKSA LAM A CHEMZAM

- a. Thiemna leh pilna
- b. Hauhsakna leh duhamna
- c. Genthiemna leh neihlelam
- d. Mi muhsitna chemzam
- e. Mi muhdahna chemzam
- f. Mah dik kisakna
- g. Midang awimawh zingte
- h. Mite suna thei kampau leh umdan haw cheng hi tisa a, chemzam chu ahia.

2. THAGAU LAMA CHEMZAMTE

- a. Pathien thu Bible
- b. Thilhihtheihna nei (powerful)
- c. Gitlohma laka vengtu chemzam
- d. Thagau in a thunun theih
- e. Thagau a pana hansanna
- f. Lunggil kisunphelte
- g. Nungzuitu dik hinkhuo
- h. Thagau lam chemza te chu ahia.

I. Isu'n Peter kawm ah "Na chemzam kha apai ah khum ah" ti'n thu A pie ahi.

Unau! Ni khat in Insak, Inthang leh I seppihte bangzah phet hi I satliem die? Ngaihtuoh hitiu. Luke 18:13 chun, "Pathien, kei migilo hi ei lungset ah" ti a thagau chemzam apata hung pawt hin, midang asuna puo a, a suliem puo a, a hinkhuou a ngaihum sek ahi.

Mah kisit a, tinglo kisa a, sukhiel kisatheite hi ahi, Isu'n a sap nuom leh a sukdam nuom chu. Isu'n, "Kuole kingailul ta tawm intin, kingaitawm ta chuh limbawl in um un au" ti'n a gen ahi. Zie

thuma hin tulai Sapchuomte lak ah mun a chang lah ta ie maw?

Kristien hat, Kristien dik, Kristien fel a kingai ngal, a Kristien chanpih leh a mihing chanpihte'n maksa'n a khawk a sau a, tisa chemzam namat zing gingtute hi akhawk chu ahi.

Bible in banga a deih? ‘Tisa’ hilo in, Thagau chemzam zaw mang dingin ei deih ahi.

Isai 53:7 = ‘A kam A ka puoi’ tih aum a. Isu Krista hin gen ding helo ahi dem? Ngaihdan fel tak neilo ahi dem? Thiemchanna ding thu gen theilo ahi tam? Zie chu ahi puoi, bangmah chu a he'i, a dawnna ding le a he'i. Mahleh, nang leh kei tadtawkna dinga thip leh thuok ahi zawi. Thiemthu gen ding ahau hi, mahleh thip hun ahiih zieka A pa thu a thip ahi zawi.

II. NAMKAWL (yoke) = Zie hin Thununna leh nungzuitu hihna (Discipline or Discipleship) genna ahi.

Gingtute chieh zelna dinga lampi chu, thununna leh nungzuitu dik hih hi ahi. Mi khenkhatte'n Pathien lauhna a nei puou a, a vei leh chang ah mi a satliem zel sek ui. Kingainiemlo, dik kisa zingte gingtu ana hih ziekun, namkawl puo a, a umzie he te'n chu, a mihing chanpihte sukiem malak in a dawmsang ua, a tawsawt ua, a humbit sek ui.

Tulai Sapchuom chu, kuo alopipen die? Kuo a thuneipen, kuo a challang ti a sinsakte laka politics sangtak ana lut bang in, tulai inle zie lungthim, ki-elsa dukdaklo, kitaihsiekna phalo tak hin, mi tamtak, puitu tamtak lunggil a luoh zo ta hilo maw? Vangama lopipen ding chu I hettheihna ding un, Isu'n “Na lak ua a neupen chu a lopipen ahi” ti'n a dawng ahi. A neupen hih a ngai phawt ahi chu.

III. NEUPEN =

- (1) Lalpa masanga bawkkhup zingte
- (2) Kingaisang lo hielte
- (3) Mi lungchuolte leh chapolute
- (4) Mi nunnem leh zaidamte genna hi. (Let him deny himself)

Unau! Na chemzam kha, a matna ding leh a kawihna ding ah kawih in, ut dan dana vaiviel kha Isu'n a zakdah ahi.

Thununna, Namkawl chu puonla, tichun, aneupen hihna chu

chang thei inla, Tisa chemzam kha thagau lam chemzama ahung chan angai ie. Tichun, van ah alopipen hithei tai tiu.
NA CHEMZAM KHA APAI AH KHUM IN” Lalpa’n a thu vangsak ta hen.

ITTHIKNA!

(I Sam. 18:9 ff)

-Rev. Soikhogin Thangzom

Ginna a pasalpha, kamkei dungsun David in Philistine mihat khawkheng Goliath, a vaisuongseh a a sehlup, tuol denna a kinei hiela a sehpaih zieng khan, Philistine mite hansanna cheng cheng chuh a chimsiet sak vek mai ta a, nahgawp chunga tangmam vak thawm ziek mai mai inle mukmul kikhen hawk hawk in a taisie mai tau hi. Goliath lu David in a hun lak, aihna’n nupi hawn chun im ding leh gen ding le hisap man se se lo in, lam pum in, Saul lampak vek kisa’n; “Saul in a sang a sang a that a, David in a sing a sing” ti’n nikchuol mawng kizapmat hiela ana lampak uleh Saul chun, “David in sing that a tiu a, kei hile David in hun chan khalawh thei mai ding dan ahi hi” ti’n a itthikna lung ahung puong dawk that mai a (I Sam.18:8,9). Diktak

chun, David in Goliath ava sawisak lai khan Saul leh a sepaihte haw khah Ela guoma Aisawk bang maia khawdak ngamlo a kisel ahiu a. Thih lubuk phala pangte lawhtitna a chawihmawina lallukhuk amah a dinga ana kihauh zieng hi chuh mitpheipu taphawtte a dingin vang vak pawm zam zieng ahaksa deuh na ie. Zie itthikna nun hi chuh asie tho na ie maw? Zie itthikna hin gamtin sawk in Sapchuom na tieng ahinle malzin nawnlo ahi. Ei hihkhelhna a mite minsietna khuksak ham guot a, mi nasep thilbawlpha chunga minphat kilak guot ham hamna lungthim vervek leh dawha haw hih Kross chauh lo chun a that thei puoh ngal a!

French gam lal, Philip August leh a sepaihte galdo dinga a kuondawk ding kuon un, lal Philip August chun a sepaihte

kawm ah, “Kidona phuola pasalpa leh hangsan pen pen chuh I hung kit tieng uleh kei ngei in ka lallukhuk hih khuksak ingka ting, gam pumpi ah lal dinga phuon hingal in a” ti’n a sepiakte ma ang a dawhkan chunga chun a lallukhuk chuh hawktha’n a kawih a. Tichun, galdo in a kuondawk tau. A galteu zo a ahung vaihkit phet u chun a sepiakte masanga dingdawk in, “Khaile, I lak ua pasalpa, kamkei dungsun sakmin chuh hun lam tau le!” Akhata khatcha le kamkeu ngam um talo in, a thip dildel mai tau hi. Atawp chun, a lak ua mi hangsan pasal khat chun, “Aw lapen, zie lallukhuk hih nangmah mah tawh na kilawm pen ie” ti a a vak khuksak phet chun mitin chuh kipak in a kiko zak tau a, ama’n le hun liemta haw cheng cheng sangin mi ngaihsan a lehtam in a lawh tai.

Amau laka chun lallukhuk kichuh buoina a um puo a, a khu ding tak leh a kilawm pen khuksaka a um ziek chun a gam mipite kipahna a punsak hi. Insak, inthang, khuo-le-kieng leh Sapchum haw a I buoina sek hawu hih lallukhuk kichuh, ki-itthiktuohna haw hih hithei dingin na he’m? Lallukhuk hi chu maw, a khu ding tak in a khukloh leh akilawm thei puo a, kuomah a kipak khuk hile um theilo ahih ban ah, a khu

ham hamte a dingin le lopi tak sangin, minsietna chauh ei sek ve. Mihiem lakah a khu ding takte’n, amau chunle Lalpa luchunga ngakna chang a het uleh mipite le a kipak u a, a boruok a hisel sek hi. Sapchuom leh mimal tin in lopina leh chawihmawina a chang ding tak leh a kilawm tak Lalpen piekna chang hetna mun taphawt ah malsawmna’n Lalpa’n a mite a kan sek hi.

Pathien in Abel kithawihna leh thil hlan a kipahpih ziekin, Kain chun itthik in anau Abel tuolluonga siel lawh a, van khupsin nuoia vakvai mai dingin a hinkhuo a mat lawh hi. I seppihte leh unaute Pathien deihsakna chang deuh a I het tieng leh kipahpih tak sangin, itthikna’n I dim sek um? Unau itthikna lungpu him him chuh a damsunga nuom muol dak leh mi ngaihnat lawh khat le umlo ahi. Itthikna hin itthiktu hinna neksiet zel ahi a, kullo baksaka melma kisiemna le ahi. Itthikna hin sunglama kimelmakna atun a. A seppihte tak ngiel le mi’n a itthik chun a itthiktu hinkhuo khah thalek gamgaw gam chang mai thei ahi. Ahi’n kideihsak tuohna leh kikhawmtuohna mun vang chuh Hermon daichim, Zion tangte a kiesek tawbang malsawmna’n Van Pathien in a kan sek hi.

EVANGELICAL SYNOD CHURCH 1998-2019 KUM THUPI

- 1998 – Nung lama thil um haw chuh hengilh in, malam a thil um haw chuh delh zawi tiu. (Philippi 3:13)
- 1999 – Lalpa lam ah vaikit hitiu. (Lamentations 3:40)
- 2000 – Thilpiek a Pathien ho. (Proberbs 3:9)
- 2001 – Hukdamna leh Kipumkhatna. (Rome 10:1; John 17:21)
- 2002 – Lalpa chuh pakchau in. (Psalms 150:1)
- 2003 – Hukdamna Pathien. (Psalms 68:20)
- 2004 – Na Pathien tuok dingin kisan. (Amos 4:12-13)
- 2005 – Na Insung thilte hih tup in. (Isaiah 38:1)
- 2006 – Insung hihtup kum. (Isaiah 38:1)
- 2007 – Kisiemthak kit hitiu. (Nehmiah 2:17-18)
- 2008 – Isu lam enzing hitiu. (Hebrews 12:2)
- 2009 – Malam zuon zel hitiu. (Hebrews 6:3)
- 2010 – Thim apat vak ah. (Isaiah 9:2)
- 2011 – Kipak kawma Lalpa nasep. (Psalms 100:2)
- 2012 – Chanchinpha zieka lamdanna. (Rome 12:2)
- 2013 – Midangte dinka vangsakna hin. (Genesis 12:2)
- 2014 – Thagau leh thutaka pathien ho. (John 4:24)
- 2015 – Krista Isu lungthim nangmau ale um hen. (Philippi 3:5)
- 2016 – Khovak chate bangin um un. (Ephesians 5:8)
- 2017 – “Krista sika palai.” (II Corinthians 5:20)
- 2018 – Gamlak ding tamtak aum nalai hi. (Joshua 13:1)
- 2019 – “Thuokhat takin tai hitiu.” (Hebrew 12:1)

---00---

LALPA'N PAUCHAM DAN EI SINSAK

Lalpa'n paucham dan ei sinsak hi ki guol tak a i gen theih na ding un khatvei Chamna Aw a hin hun sulang ingka.

Matthai 6:9-13

“Ka Pau van a um,
Na min zah in um henla,
Na gam hung tung hen la,
Na deih bang van a hih ahih bangin lei ah hih hi hen.
Tuni a ka nek khawp uh an ei pie'n.
Ka bat uh ei ngaidam in;
Kei un le ka thil bateu ka ngaihdam tak bang un.
Thepna ah ei puitut ki'n la,
Gitloh apat in ei hukdam zaw'n;
Gam leh, thilhiih theihna leh, lopina chu,
Kumsawt in nanga ahi ngal a.
Amen.”

Lalpa'n paucham dan ei sinsak hi kituok tak a, thum lung lung zieng a gen khawm ding ahi. Lalpa Pauchamna tih ding le ahi puo a, Lalpa'n paucham dan ei sinsak tih zawk ding ahi. Kituoklo tak a i gen khawm uh ka het phat leh ka puo na thei mah mah hi. Ho-in cheng a hi kituok tak a gen thei chiet ding in ka hun ngen hi.

-Tinlal, Muntha

Evangelical Synod Church
BALARAM KHUL, NAMBOL
BIBLE SEMINAR
29 – 31 March, 2019

Report

Speaker : Rev. Henkholien, Director BCE.
Sponsored : Synod Headquarters Church, ESC.

Hun sawtpi pauchamna a I na hetzing uh, ESC, Balaram Khul mun ah Bible Seminar chuh Date 29 – 30, Arpil, 2019 ni'n Pathien vangsakna tamtak tawh matzawh ahi tai.

Zie Bible Seminar hih Synod Headquarters Church ESC sponsor na a neih ahi a, Rev. Henkholien thugen tu'n apang hi.

Zie Bible Seminar lawhtitna ding ahin New Lambulane ESC Sapchuom apat in mi gup (6) in social work ei hung neih pih ua, achung ua kipak thu suklat ahi. Zie ban achun unaupa Mr. Lalkhosiem in latrine ading komut ahun piei, kipak aum mah mah hi. A kisenna Lalpan aleh tamtak in vangsak hen.

Chun, Bible Seminar sîm in Ithing apan in mi 16 ahung ui, Synod Headquarter Church apat Local Missionary Board member sagih (7) ahung tel ua, Keisampat apat in unaupa Jayma le hung a, kipah aum tak zet hi.

Zie lo chun, Bible Seminar panpih na dingin kiphal takin anuoi ate hin thil piek ahung pieu hi:

- (1) Mr. Monihar, Balaram Maning apan in anchang 20 kgs
- (2) Mr. M. Chandra Deva, Balaram Mamang apan in ` 500/-
- (3) Lamphel ESC apan in chini leh bawngnawi pahchuom tak ahun pieu hi.

(* Sl. no. (1) & (2) te hih gingtu hilo ahiu)

Chuleh, a khuosung apan in meh ding; ancheh leh thil dang dang pie le hun tieng aum ui.

Chun, kikhawpna hi a nga (5) vei neih ahi a, kikhawm zah tangpi anuoi a bang hi ahi:

- | | |
|-------------------|---------|
| (1) Tunkim zan | - Mi 26 |
| (2) Ani khat zing | - Mi 50 |
| (3) Ani khat zan | - Mi 58 |
| (4) Ani nih zing | - Mi 65 |
| (5) Ani nih zan | - Mi 70 |

Zie hung kizik dawk hi Meitei te chauh tihna ahi. Zielo chun kikhawp cheng leh unaute Bidyananda leh Singibala, Bishnupur Kwaksiphai a pan in Pathien pahchakna la, thum leh li ngaihthak ahi.

Chuleh, nih vei annek pihna neih ahi a, mi 60//70 vel in ankuong aum bawk ui.

Speaker pa le a kipiekna ana sa a Pathien in a mang na sa mah mah zieng a, achung ah Pathien min in kipah thu I gen tak zek hi.

Local Missionary Board, Synond Headquarter Church te a kipiekna anasa a, sumlepai tam tak leh tha leh zung seng in gim leh cawhl le khawksa lo in, ahung kipieu a, aki sennau zal a lawhting taka programme kimang thei ahih ziekin Lalpan taksa leh thagau ah a lehtamtak in panpih in malsawm ta hen.

Atawpna pen ah, bangtik ale pauchamna hailo a ei na neih pihte cheng cheng chung ah kipah thu lunggil tak in ka gen hi.

Zie tawbang programme kimang hi a lawk tak zet a, nulepa tamtak hung kikhawm te I muh leh lungthim kipahnna a dim hi.

Lalpa lopina chang ta hen.

Lalgam ading a na seppih uh,

Sd/-
Mr. Thienlal
Balaram Khul, Nambol.

---00---

EVANGELICAL SYNOD CHURCH BOARD OF CHRISTIAN EDUCATION

Secretariat, Chiengkonpang – 795158

May 1, 2019

SYNOD BIBLE SCHOOL 2019 CHIELNA

Lalpa Isu Krista min in chibai ka hun buk hi.

Synod Bible School : 2019, June 11 -27 sunga ESC Khukpi, Council Hall, Secretariat, Chiengkonpang a um ding ahi. Sapchuom a, kuo hileh a tel nuom cheng tel theih ahi. A diekin Sapchuom Upate leh ESC Biel pumpi a Semtute, Bible zilna neilo cheng telkim chiet ding ahi. Mahni mamawh thil bangkim hun kipuok chiet ding ahi. Tunna, giekna hih eimah lemchang dungzui a kingaihtuoh ding ahi. Tunna, giekna lemchanglo aum chun BCE, ESC Khukpi, Secretariat ah hetsak ding ahi.

Pathien in hun pha ei piek chun, Synod Bible School hih I ngaih khawk ding uh ahi. Kilâkna umlohma achun mipite a beimang sek u a; himahleh, dân zawpte vang chuh vangsak in a um sek ui. Thuchingte 29:18. Tununga I Sapchuom puitu ding, lamti'n a Lamkai, Lawiupa ding mamawh I hiu a, ngaikhawk a, hung tel chiet dingin ka hun ngen hi.

Krista A, na seppih uh,



Rev Dr Henkholien Gangte
Director, BCE, ESC
Email:elliengangte@yahoo.co.in
Mobile:+919436295618

---00---

KRISTA MO DINGA HUOL NA HI

By: SM/Clk Paukhogin Gangte,
15 AR, c/o 99 APO

Nungak thiengtho; pasal khat mai a dinga huol guolin, Krista dinga ka hun huol na hiu hi. (2 Korinth 11; 2). Nungak thieng dangte chule ahungtung ua, “Hepu kawt ei hung hawnsak in, kei ule!” a tiu a. Amah chun la “Tihtakzet a ka hilh na hiu hi, nanghaw ka hun he kha puoi” ti’n a dawng a. (Mathai 25; 11-12)

1. ‘Huol’ kit i hi thumal li chauh ahi na a chuh, banga atup leh adeihpen hechiente ding in huol loh a um khak ding hi thil tizat um leh lauh um tak ahi. Aziekchuh Huolna laka tellote cheng vang chuh taksa leh thagau a kumsawt thihna chang dingte tihna ahi. Mihiemte hi Adam bawhsietna kikawppihte I hih ziek un, Pathien cha I hihna cheng abei a, taksa leh thagau in I thiу tau hi. Zieziekchun Pathien in a chapa hun sawl in Kalvari ah amah Mo ding in ei hung Huol uh ahi. Khutihziek chun Sawlchak Paul in Olive bak kizawppihte na hung hi tau a tih guol in, Krista zala thiempanga Pathien golouhpih ding te I hung hi tau hi. I ngaihtuoh leh mihiemte hin hawihna leh phatna bang

I nei ua ahi die aw! Pathien in a lungsietna ei haw migilote chunga a latsak zing hi thil lamdang tak khat vang ahi. Felna, bukimna leh diktatna muh ding a umloh nung inle, I sik un a thuok a, a hinna natieng it lo in ei pie a, zie guola lungsiettu Pathien I neih mai uh hi, bang tienga mi vangpha I hiu em tih, ngaihtuoh kham tak ating hi. Khawvel ahin Pathien helo in nicheng in mihing asanga sim in thihna a tuok ua. Ei haw titna bangmah neilo leh migilote’n a thawna Pathien lungsietna I chandanteu haw hih I ngaihtuoh leh dan leh a lungsietna haw hi bangmahlo ah I kawikhak ding uh, a lauh-um takzet hi. Dan leh, Huol loh a umte’n Pathien lungnatna tuok un tin, zie chule a ngaihtuohna khel

ua haksa leh nasa hung hiding ahi. Zietieng chuleh hahpi'n kisik un intin, zie chuh amau ding in umzie bei hi ta ding ahi. Zieziekchun hunpha I neihlai un Pathien phatna haw hi ngaikhawk in, a lungsietna hi athawna kawih lo in, amah ding in gahdawk guo'n hahpan in pang zawi tiu. Pathien in huntawp lam tiengleh haksatna leh gimtheina namenlo mihiemte chunga tung ding ahi tih ahet ziek in tu a a damlaite chung ahin a lungsietna leh a hehpihna haw hi hailo in a latsak zing zawk ahi. Khutih ziek chun, Sawlchak Paul in Korinth Sapchuomte hi nungak thiengtho Krista dinga Huol ahihnau hi a hetzing lo u chun, danleh Gul in a chit gukhahnna Eve, a thep guol khan, a lungthim ngaihtuohna teu chuh, bang em ti'n Krista kawma bukim tak leh thiengtho taka a kipieknateu chuh suksiet in um kha'n a tih a lauh ziek in, avel avel in hilgaih in lehkha athak zawk ahi (II Korinth 11-3).

2. Khawvel mite Huol dan:
Malai khan nu leh pa leh pi leh pute'n huol kitii hi ana mang sek ua, zie chuh a insung kinaihpih pente, ahihloh leh

anunglamte ahim, a guolngaih pen ahimte chanu teirawl pan pan piting nailo chuh a chapa zi ding in ava huol sek ua. Zie guol chun gancha leh thaichi hawih a sakpen leh a deihpen pente apitin masang in midang a chankhak diu a lauh ziek in, kei a ahi tai tih hetna ding in melchikna siem in ana "HUOL" sek ui. Khutichun invengte, insakte leh inthangpa Uino ahim, Vawkno ahim hawih a sak pen pen chuh huol in, melchikna siem in apitit kal a ngak sek ui. Zieguol chun lo a thaigah-changkha, changmai, Dakdil, Begul, vaimim leh samphawk leh adang dang hawih a sak pen pen achi ding in a huol ua. Zie umzie chuh apitin kêt masang in lawh a phal puo a, apitit kal ngak in ahawihthei pen in a enkawl sek ui. Zie haw chuh, midang lawh aphan puou a, thu le neih aphan diek puou hi, aziek chuh amau ading bika huol leh kawih chuom ahih tak ziek in. Zie guol chun, Isrealte hun lai khanle mi'n azi ding in nungak thiengtho a huol tiengleh feltak leh kituptaka in hinkhuo thiengtho mang in, pasal dang tawh minsiet ahim ahihloh leh midang in asuk

minsiet ding ahim akiphal puou ui. Zie hun sung chun minsietna ahim, thanhuoina bang a neih u chun, a gilo pa ahim, nu ahim chuh khuo pawlama pui in suong in a seplum sek ui. Khutia chuh, ahun tiem atun a apitit tieng leh kichenna siem in nupan in aum chauh sek ui. Bible ah, Isu nu Mary khale Joseph tawh kihuol ahih ziek in, zi leh pasal a a kineih masang un a kisuminsie puou a, hinkhuo thiengtho a mang zawu hi.

3. Huol te Melchikna: Zie guol chun ei hawle, Pathien hehpihna leh a lungsietna ziek in nuolna beia amah Mo/cha hiding in I gitlohma hawu gitloh a sang lo in, Kalvari ah a chapa Krista zal in, I sukkhelhnau leh I gitlohnau cheng cheng nuoimang in ngaihdamna I chang tau a. Zie chuh le ei mah felna ziek leh phatna ziek hilo, Pathien lungsietna lieu lieu ziek ahi zawi. Tuni hin bangmah lo in kigel in, kingaihtuoh sek leuhing le, lei leh van siemu Pathien neitu leh amah Mo dinga Huol a um I hi tau hi, I ngaihtuoh leh alopi na maizen el, Zie khela cha hihna mantam hi chang kit talo ding I hiu,

zieziekchun hunpha I neih teu hi I thahthak lo ding uh ahi, khutilo chun kinepna dang him him umkit talo ding ahi. Zieziek chun, Sawlchak Paul in Pathien mite I hihna I hetchil zawkna ding un, Ephesi khuoa sapchuomte kawm ah hiti hin a gen a, amaha na hih tau hi tih, melchikna chuh thagau thiengtho tiemtehna mahuola namkhum na hi tau hi, ati a. Mahuol namkhum kiti hi, mi'n amah a lo chuh kuoma'n mahuol namkhum mai mai lo ahi. Govt. inle, lehkha azik ahim, athak him chun a Office mahuol (Seal) anamkhum ua, zie umzie chuh zie lehkha hih, zie Dept. ahim, zie Office apat a suok ahi ngeina'i tih namdet/ mechikna ahi. Zie guol chun ei hawle, Pathien in a chapa Krista thisan zal in thagau thiengtho mahuola namkhuma um I hi tau hi. I ngaihtuoh leh, Pathien lungsietna a lopi dan hi genzawh ding leh zikzawh sen ding guol ei puoi. Thagau leh taksa a thi I hih lai un Pathien in a chapa Krista thisan zal in suohchakna leh hukdamna lopi ei siemsak tak ziek in Lalpa Pathien chuh pahchak in um hen. Zieziekchun, hehpihna zung khawha, bul dettak nei a,

a lungsietna athukzie leh alet zie hetchila, khanglien deuh deuh ding in hailo in Paucham zing hitiu.

4. Huolna Paihthakte: Bible in, miphaziek in kuo ahim khat in a hinna piek le angam mawh die! A ti a, aleh migilote ziek in kuo a a hinna pie ngam ding? ahun ti kit a. Tulai Sapchuomte hin dakkal khat na tiengle Pathien a dinga kipie ngam mah mah lo, I hinna piek ding vang chu chuh haksa ten ding in gingchak aum hi. I veng leh khuo sung I et leh zie achunga batphakloh dinmuna ding I hi tau hi kiti lele kigen suol ding in ginchak aum puoi. I gam leh nam sunga thutak leh diktatna ngaihsanna him him um talo, Sorkar nasemte'n le dan lo taka sum tamtak tak laklutna ding hun lemchang hawl ta, zie guola sum a muh hawu chuh athieng puoi tih sang in Pathien malsawmnaa ngai ta, sumkawlveite'n le diklo tak in sum tamtak tak la lut leule amau leh amau thiem kichan guo tei tei, Pathien lau mawng mawng um talo, muntin mai hi gukhahna, lepgukna leh kigensietna a dim zo ta, I ngaihtuoh leh lungkham aum takzet hi. Ziete haw chun athil

gitlo hih hawu zieka Pathien kawma thupha chawi a, ngaihdam a nget sang un, sum leh pai neih ziek leh hih thei leh bawlthei kisa'n Sapchuom lailung chuh in Pathien kiselnaa mang in thagau lam hinkhuo ngai pawimawh guola lang in Sapchuom sung ah thu a neih guo tei tei ui, kiti lele kigen khiel lo maithei ahi. Lalpa Isu'n Pharisaite leh danthuzikte kawm a khan nanghaw alim thawh mai maite haw na chung uh agik ie! A tih khah ei haw chunga le tung ahi ta leh? Bible in, mi'n a tuh mah chuh at ding ahi a ti ngal a. Setan in a lungthimteu a suktak tâk ziek in Pathien lauhna chang a he puo a, Sapchuom suminsie'n a pang ui, kiti lele kigen val ding in ka gingcha puoi. Zieziekchun, Sapchuom sunga lawiupate hin thagau lama I gam leh I Nam sung siemphat ahih kitna ding in panla thak thei leu ut aum mah mah mai hi. Leng David in, Hit mi Uria zi a gitlohpiah a, zie chuh selna ding in galmun apat in a pasal Uria a sam a, zan nih hiel a zi kawma kuol ding in a sawl a, himahleh, a zi kawma kuol sangin a pu suokte laka kawtkhak bul ah a kuol a. David in zie chuh a het

phet in Joab kawm ah lehkha a zika, amah a puoksaka gala thah ding in a sawl kit tai. (2 Samuel 11: 1-21). David thil hih hi Pathien in a hengilh puo a, khutichun thiemgau

Nathan sawl in, David kawm ah nangin a guk in na hih a, ken chuh Isrealte cheng cheng mitmuh in khawvaka hih ding ka hi a ti a, Pathien lungnatna thu ava hilh hi. I ngaihtuoh leh Isrealte leng lopi tak mai Pathien kipahna mah mah, ka lunghim bangpu ka mu tai ana tihna hiel, Leng David khatvei a gitlohma hi Pathien in a chung ah zahngai in ngaidam mai le chuh kilawm tak ahi a. Himahlele, a thilhih dungzui in Pathien in achung ah vai ahawm tho tho hi. Aleh ei, haw'n thil gitloh I hih hawu hi Leng David thil gitloh hih sanga kha neuzaw a I ngaih uh ahi ta die leh?, Pathien in le ngainep zaw mah mah in a, I tih ziek uh ahi ta die? Ngaihtuoh um tak ahi. Lalpa'n Jeremiah kawma, Jeremiah ngaitie, Zektan hi ngal a, zektan loh banga um chuh gawt ding ka hi a ti a. Isreal inkuonte cheng cheng le lunggil zektan loh ahiu hi, atii. Unaute, Kristien hi ngal a, Kristien lo guola um

chuh Pathien kipahna ahi, a lungnatna? Lalpa dawtna hi tu'n dawng nuom lo in um leuhing le, dan leh I chamlo ua I dawn ni'u hung tung tho tho ding ahi.

5. Krista Mo dinga sapna:

Mi lopi leh mihausa leh lekhkathiemte kikawppihna baihlam pen chuh a Mo ua pan hi ahi pen hi. M.A. zi chun M.A. a kikawppih a, M.A. vang chuh hilo hiel ahi. Zie guol chun Isu kikawppihte le Isu hilo hiel, himahlele, amah kikawppihna baihlam pen chuh, amah chuh tela, a Mo dinga um chuh ahi. Amah Mo thiengtho hidinga ei chielna hi, I muk mai hilo, I kam mai le hilo a, "aw" tih hi ahi, Rebek in Isak a pasal dinga pawm a, Elazar in Isak kawma a puihlut guola kha, ei haw le Isu kawma Mo dinga I lut ding uh angai hi. MA kikawppih ding in MA kawma I kipumpiek angaih guol in, Krista kikawppih ding in amah kawma I kipumpiek ding uh angai hi. Khenkhat Mo hilo, himahlele, Krista Mo puite laka tel Mo te sang sanga kipak zaw guola lang tampi a um ua. Amau haw chuh lawite lak ah tel leule chawm lo kala vaikit dingte

ahiu. A thawmpa cheng leh genthiem leh hechien kisa nazawng in Krista a kikawppih vek puoi. Kipumpiek loh lai nei kha talote chauh hi Krista Mo ginum ahi zawu hi. Lalpa Isu mihingte lak ahin a deih leh a deihloh chuom bik, lungsiet leh lungsiet loh bik a nei kha puoi. Mihingte vang in chuh deihbik leh deihloh chuom bikte, melhawih leh melhawihlo tih te I nei sek ua, chate a ngou deuh leh avawm deuh tih bang I nei sek ui. I chateu ngou deuh leh vawm deuh I lungsiet dan a kibat guol in, Isu Krista'n le deih bik leh deihloh bik a nei puoi. Isu Krista Mo hiding in Pathien in thagau thiengtho mang in mi cheng cheng ei chiel uh ahi zawi. Khatvei Nungak naran ngou samlo khat in MBBS Doctor, a pasal ding in a nei ta mai a, ka vawmnaa chuh ka nalh hi, ti hileh kilawmtak in, a lungsietu masa achun analh hi thou hina'n a. A pasal chuh a ginchak sangin a haus'a'n a lopi ten a. A insunga a thilneihte matdan leh etkawldan a zei hiel puo a, Doctor matchak vang vang a mangthiem thei him him puoi. Amah a hingal in haksa a sa mah mah a. Atawp

in a pasal lungsietna lam ngaihtuoh pha lo in, a phalo lam chauh a ngaihtuoh ta a. A zi hi ngal in Mo dinmun a luoh ngam talo in, annek hun tieng lele, ankuong siem sang in, ana ne uo, kei vang anne tâk le kei puoi a ti ta mai a. A utloh ziek hilo in, tinglo leh a kisit ziek in. Kuolna ale kuol tâk kei puoi a ti kit ta zel a, lungsiet a um hi. Mi tamtak in ka tâk puoi ka ting puoi I tihnau hi, I titlohnau leh I tâklohnau ahi zawi. A hinna I kikawppihna hih I phu ziek, I tâk ziek leh I tin ziek lama I ngaihtuoh a ahih vang chun bangmah tik in kiting puon tin, tâk le kitâk puon tin, Krista hinna kikawppih tak tak thei lo ding I hiu. A lungsietna ziek chauh in I dinmun uh luoh ngam in, I kikawppih ngam chauh uh ahi zawi. Ei haw lam hizaw lo in, Lal Isu lam ziek in I dinmun uh luohngam in I kikawppih ngam uh ahi zawi. Kikawppih ngam lo na lunghim hi kingaihtawmna hilo in kingaihniemna ahi zawi, Lalpa Isu chuh a kingaitawm a, bangtik lai inle a kingainiem kha lo ahi. Zie kingaihniemna hih ahi thilpha I hih tiengleh hung chapo sek chuh, Kingaihniemna leh

chapona hih lampi kibang gel, a suklam chieh le a toulam chieh bang mai ahi. Lampi to lele aniema chieh tawh bang phet ahi. Kingaihniemna hi chapona lungthim kiselgu ahi zawi.

6. Krista kikawppih dan diktak: MBBS, zi chuh ahung kihedawk a, "E khai ka na gawl na maizen e, ka phuloh lam leh ka tin loh lam chauh ka ngaihtuoh a. Ka pasal lungsietna leh a hehpihna nasat zie ngaihtuoh kha lo mawng mawnga ka um mai hi aw! ahun ti thei ta a. Kei titna leh tâk na him him leh phulo himah leng amah lungsietna ziek zawka zi a ei nei ahi ahun ti thei a, a pasal lungsietna a hetchien in, a lopi dan ahun muhchien chun mak a sa mah mah a. Zieziekchun ka hih theih tawk chuh a kawma kipumpiek leh a thu guol guola

um ahi zawi e" ahun ti thei ta a. Khutichun, nupan hinkhuo diktak leh nupan kihethiem tak hinkhuo ahun mang pan thei tau hi. Thu neih akichuh puou a, bangkim hetthiemna leh kilunghawltuohna'n ahung dim tau hi. A zi nu'n le, hung uh uo!, hun hih dam ing kau ti'n, a pasal zal chun a gen thei ta a. Amah chauh in damdawi piek a guo ta puo a. Khuti chun apasal a suong ngam ta a, a pasal inle a zi suonna chang ahe ta a. A zi chu a pasal ding in a hing a, a pasal le a zi ding in a hing tai. Zie guol chun ei haw le, Krista dinga hing a, Krista ei haw dinga hinga, a hinna na tieng a piek ngam guol hin pumkhata hing ding in, hun cheng in Lalpa'n ei sam zing ahi tih hezing kawm in, hun chenga paucham zing in, athak in Lalpa a hing ding in simtute cheng Lalpa'n vangsak ta hen.

THUCHING

- Rev. Khaitinthang

- ❖ Mi chuh a hauhsak nak leh a mawlpen inle mite pahchak a lawh sek hi.
- ❖ Vaihawmtu pil louh ziekin, nam chuh a buoi a, mahleh lemguot thiem umna achun muonna a um sek hi.
- ❖ Pathien masanga vaihawm ni leh, na hauhsakna chun, hun panpih puon a, a diktakna chauh kha ahi a ki en ding.
- ❖ Micheng cheng kibatna chuh mahni dik kisak hi ahi.
- ❖ Kuomah hih thi thei dingin I ki gingcha puoh a, mahleh thi zieng thei dinmun a um zing I hiu.

**LANGAITUAKHA NGEI-EM
SAPCHUAM, HO-IN, KHUATANG, SOCIETY
HITA LEH AKHANTOU THEIH NA DINGA
KALBI POIMOTE
BIBLE - PAN SAN A LAK DAWK CHOMKIM**

- ELDER N. GINA NEIHSIAL

Kuale mihing a hung piangta phawt talent beikei khat chale aurn puai. Ahinia, amei, apa amah talent kol bang lam pen ahem? Tih hechianlo atam bek ziak in kochuam sung/society sung a khan ding bang in a khang thei puoi. Amasapen in, Pathian in nang mah a talent ahun pian, ahun kolsak pen hol dok masa phawt in, zia phat chu le nang hin khua mat dan hung nuam in tin, I kochuam sung/society sung hung nuam in hung khang tou ding ahi.

**MASONNA DING LEH GAHSUAHNA DING A ABUL
HUNG KIPATNA DING A
CHUN AMASAPEN IN BIBLE TANGTE THUMNA TO
ANA SIM HIM HIM IN AW!**

- | | |
|-----------------------|-----------------------|
| (i) I Korinth 12:1-11 | (ii) Matthai 25:14-30 |
| (iii) Rom 12 : 4 - 5 | (iv) Ephesa 4:1 1 |

1. Banglam banglam a le puitu chuh vision nei ahih ngei ngei ding ahin, vision aneihna bak a amah talent kol akihet a mipite talent na tiang a het pih a mipite choh phul dan athiam ding ahi.

**CHULE AMAU TALENT BANG CHIAT A AHOP TUAK
THIAM MAH MAH DING AHI.**

- | | |
|---------------------------------------|------------------------|
| (i) Exodus 18:17-27 [Exodus 17:11=13] | (ii) Nehemia 2:17-20 |
| (iii) II Korinth 3:2-3. | (iv) II Timothi 4:2-8. |

Zia gual a chun puitu chun a mipite pan mun ahun hop tuak thiam a mipite choh phul dan ahung thiem nak le chu zia society a chun khan touh na le masonna um ngei ngei ding ahi, tih hen pan lak ngal angaita hi. Dan leh tih chu Setan pan mun ahin, tu le tun tih a pan lak ngal chu Pathian a ahi.

2. Puitu te leh mipite thupiak zuih leh pan khom chu; **HATNA LEH LOHTINNA AHI.**

- (i) Exodus 17:11-13 (ii) Esther 4:16-17
(iii) Jude 7:10-15. Judees - Vaihomte: (iv) Joshua 6:20-21.

3. Bang lam bang lam a le la chunga vai homte thu thun nung phawt phawt in aw!

VAIHAWMTE HI PATHIAN GUOT AHI NGAL A.

- (i) Rom 13:1-2

4. Nang ho houtute hon le Van a hotu lanei ui tih hezing kom in la suak teu chung in diktak leh hehpihna nei tak in vaihawm tau in, aman vai ahun hom phat leh vang, **KUAMA MAIPHA ETNA BEI A VAI HUN HAWMTA DING AHI NGAL A**

- (i) Kolosa 4:1 (ii) Kolosa 3:24-25
(iii) Hebraite 12:11-12.

5. **BANG CHENG A TAKSA THAT THEI A THAGAU THAT THEI LO CHU KICHA KIN LA TAKSA THAT THEI A THAGAU NA TIANG THAT A THIH NIHNA GEHEN A HUN KOIH THEIPA CHU LAU ZONLA KICHA ZO TAU IN.**

- (i) Matthai 10:28 (ii) Luka 12:2-7

6. Zie achunga Bible changte pauchapna to kawp in ana en him him in la ngaito thak in o. Simtute cheng amah chan mun hethiam a taksa le thagau lam a gam kek a gah suah ngei ngei ding in Pathian in hun maljawl ta hen aw!

Ka kipak!

EVANGELICAL COLLEGE OF THEOLOGY (ECT)

Nehru Marg, Rengkai, Churachandpur.

ADMISSION 2019-2020

Kuo le Pathien sapna chang, piengthak, Bible zilnuom te a
dingin

Evangelical College of Theology
ah admission bawltheih ahi.

Admission Form submit na
ding last date: 12 July (Friday), 2019.

Entrance Test ni ding date: 15 July, (Monday), 2019.

Admission Form muhtheihna:

- 1) Office ah, Office kaih hun sung in.
- 2) Website, <http://ectindia.com> ah download theih ahi.

A form man hi Rs 150/- ahi.

A Course ziltheih um haw chuh:

- | | |
|---|--------------------------------|
| (1) Class X, zo te a dingin | : Dip. Th. (2 years) |
| (2) Class XII, zo te a dingin | : B. Th. (3 years) |
| (3) B.Th. (ATA) Or B.A. zo te a dingin | : M. Div. (3 years) |
| (4) M. Div (ATA) or B.D. zo te a dingin | : M. Th. Missiology, (2 years) |

Rev. T. Kamgin Gangte
Executive Director
Evangelical Synod Church



BIBLE SEMINAR

ESC Balaram Khul, Nambol

March 29 – 31, 2019

Speaker : Rev. Dr. Ellien Gangte

PIN

--	--	--	--	--	--

Chamna Aw

(Evangelical Monthly)

Regd. No. 64436/96

E-mail:e7s7c7@gmail.com

www.synodchurch.com

Alak man apat ₹

If undelivered pliz return to:

ESC SECRETARIAT,
Chiangkawnpang, Churachandpur,
Manipur - 795158

Published by Rev. T. Kangin on behalf of the Evangelical Synod Church
Printed at: THAWNSAAU PRINTING WORKS, CENTRAL LAMKA.